





Vinars al è stât il **Contecurte day**.

Il cuart, dopo chei di Listize, Flambri, Passarian. Il cuart ma chel dal decim an di Contecurte, cul teme dal dîs dîs dîs. Al jere biel fâlu a cjase dal Ostîr e in grazie di chei de **Pipinate** o vin rivât a cumbinâle inte bielissime sale de canoniche e no podeve lâ miôr. Si scuen scomençâ propite a disi graciis a chei di Sclaunic. E vuê che o sin domenie, stant che la fieste e je lade indent a cjase dal ostîr fintremai di sabide matine adore, podìn dî che al è il “day after”.

Alore. Cemût je lade la serade.

Par cui che a nol jere, cun chest an o vin ancje lis diretis facebook, e al pues cjatâ une buine part des contis propit su la **pagjine fb di Contecurte**, che come ogni imprest, o stin cirint di doprâ inte maniere miôr in grazie de nestre Sartore, Astrid - Stralunade - Virili, che forsit e che che dilunc la serade e à lavorât di plui, riprendint lis contis e fasint fotografiis. Ma vignin a la serade. E a lis contis, cuntun struc de gare, par cui che nol è podût vignî.

Us disin subit che la serade, che veve di viodi i Chei di Contecurte a cjatâsi “almancul a vot” par meti adun lis ultimis robis (microfons, leturis, senografie...) e à viodût une pic di surealitât cuant che il gnûf assunt de ostarie - Jacum Trevisan (jentrât di dirit tal organic di Chei di Contecurte) al à telefonât a vot e mieze par domandâ dulà che a jerin ducj... che a GLAUNIC nol jere nissun Contecurte day. Sì... vês capît ben... al jere lâ a Glaunic, invezit che Sclaunic, e si come al è rivât istes propit cuant che o vin tacât, nus tocje disi fortunâts che nol sedi lâ a Salonicco!

Par no comentâ dal nestri cjantôr, che al veve di sunâ la ghitare dute la sere, che al è rivât cuntune ghitare discuardade e cence un pletri che al sedi un. Par fortune che l’ostîr i à proviodût acordatôr e pletri (che i à robât). Pobon... ma a la fin o vin cumbinât istes. Il nestri Poete, Franco, al pareve jessi il plui san di ducj, e chest la dîs lungje.

Lis contis in gare a jerin, come simpri, 12, e a son tantis, ma nus plâs cussì. I participants, in ordin di numerazion de conte, a jerin chescj:

**1 - Une Staiare di Gaetan Cogôi**

**N.2 - Vendi scovis (a S.) di Checo Tam (lete dal Checo)**

**N.3 - Sui dêts de man di Margarite Cogôi (lete di Jacum)**

- N.4 - Bandiere rosse di Franco Vigo (lete di Rafaêl)**
- N.5- Reclam di Maghe Olstrele (lete di Jacum)**
- N.6 - Hamar di Carli Pup (lete di Rafaêl)**
- N.7 - Il bocâl di Laurin Zuan Nardin (lete dal Checo)**
- N.8- I purcits da la Moche di Pauli Jacus (lete dal Checo)**
- N.9 - Deventâ vielis di Gianluca Franco (lete di Rafaêl)**
- N.10 - Dîs dîs di me e di te di Stralunade (Lete di Margarite)**
- N.11- I dîs piruçs di Massim Furlan (lete di Rafaêl)**
- N.12- La bibliocheche di Rafaêl Serafin (lete di Jacum)**

O podês viodi cemût che e je lade cu lis votazions inte lavagne che o vin rivât adore a cjatâ ancje une adete ae lavagne di dut rispiet, Francesca Battistutta, from Arlef, che si è puartade daûr ancje un cameramen e un fonic di dut rispiet, che a àn riprendût dute la competizion e ancje il prime e so redut il dopo, dulà che al vignût fûr di ogni.



La gare? Il vincidôr di chest àn lu vês viodût. **Carli Pup**, che si conferme vincidôr par la seconde volte la competizion cuntun toc che ca di un pôc o podarês lei su la osterie e che al met dongje i temis dal furlan, come lenghe e come persone. Nol è un toc legri, al è dramatic, ma e jere une conte curte perfete, par timps, clime, sielte des peraulis e o crodin che la vitorie sedi meretade.

Al secont puest al è rivât un di cjase, **Gaetan Cogôl**, eliminant dilunc de competizion nuie mancun che sô fie, cuntun toc, la staiare, che a partî di un bal e di une vilote e meteve dongje une storie legre, une vore sincire e semplice.

Tierç, cuntune storie ironiche e picaresche, basade su di un fat vêr, che al è capitât di spes intune vore di paîs, **Pauli Jacus**, contadôr di vecje date, che nus à contade chês dai Purcits da la Moche.

Il premi dal scandai fb par il **miôr incipit** lu à vint il nestri **Laurin**, ma la butilie l'ostîr si è smenteât di daiâle e je inmò che e cor ator pe machine.

I premi di Carli i rivarà dret in radio, magari lunis. E chei altris, insieme cun Gianluca, cun Laurin, forsit cun la Maghe Olstrele, a jerin ducj presints, e sperìn che si sedin divertûts. Nus mancjavin, perdonâts, il nestri berlon de Ostarie, Michêl, il nestri Cramâr Pablo e la nestre Coghe Serene, ma o contin di jessi al complet par la prossime serade di Contecurte, za proviodude par il 9 di Jugn a Gjalarian.

E dopo? Cui ringraziâ? I foescj che a jerin presints ancje se no capissin il furlan e che si son divertûts distes, la mari e il pari dal ostîr che a àn preparât di mangjâ par un regjiment, ducj i contecurtârs che in cualchi maniere, dilunc chescj agns, a àn permetût di rivâ a seradis come chestis, dulà che **lis contis a son protagonistis e dulà che il furlan al ven doprât in maniere diferente par leterature di ogni fate e nivel.**

Avonde cussì... Al prossim an, e mandi a ducj!

*Il vuestri Ostîr*